

四庫全書

集部

欽定四庫全書

集部

道園學古錄卷二

詳校官庶吉士_臣李如筠

侍讀_臣孫球覆勘

總校官進士_臣朱鈐

校對官中書_臣孫球

謄錄監生_臣項朝槐

欽定四庫全書

集部五

道園學古錄

別集類四元

提要

臣等謹案道園學古錄五十卷元虞集撰集

字伯生蜀之仁壽人宋丞相允文五世孫居
江西之崇仁從臨川吳澄遊以薦授大都路
儒學教授擢國子助教遷集賢修撰翰林待
制兼國子祭酒文宗天曆中拜奎章閣侍書

學士進侍講學士順帝初謝病歸臨川卒贈
仁壽郡公謚文靖集著作為有元一代冠冕
平生為文萬篇存者十之一二其在朝應制
歸田方外諸藁總五十卷者曰道園學古錄
其中之詩稿亦曰芝亭永言又有別集曰翰
林珠玉其從孫堪又訪得其詩七百四十餘
篇曰道園遺稿今之行於世者又有道園類
稿與學古錄互有出入金華黃潛以學古錄

為集手自編定然其天藻詩序云友人臨川
李伯宗輯舊詩謂之芝亭永言又賦謝李伯
宗題云至元庚辰冬臨川李伯宗黃仲律來
訪山中拾殘稿二百餘篇錄之攷伯宗為李
本字則是編當為李本所定也乾隆四十六
年九月恭校上

總纂官

臣

紀昀

臣

陸錫熊

臣

孫士毅

總校官

臣

陸

費

墀

欽定四庫全書

道園學古錄卷一

元 虞集 撰

賦

別知賦送索伯長

余忽忽處此之無故兮，幾惺惺以自窮。逝斂裳以遐征，兮抗九霄之雲風。頻三辰之徘徊兮，遲後古以爲期。何夫子之俔俔兮，亦踉蹌而在茲。于嗟乎世德之浩浩兮，

恥謂人以不賢陳珮玉於交達兮被徒輿以瑤環設厚
顏之鬱沈兮孰敢即問乎津涯發疾叫于咽嗌兮衆披
靡而莫支夫冶倡之狐惑兮豈不足於內揆顧西子之
蓬垢兮並返忌乎故意惟前聖之無悶兮老氏亦貴夫
知希顧涼薄之多懲兮猶慷慨而尚辭余固將去此而
無悔兮念夫子之與我日進余以不及兮又證余以其
可余嘗究往來之為道兮論因革之為權莫或知其獲
落兮子獨謂其固然庶久子以自輔兮克有聞以時行

忽先我而南驚兮殆若為乎余情迺歌以送之曰長江
渾渾兮春多浪波白日耿耿兮擊楫為歌天薄我賦兮
非以病我于嗟兮昔之盛者何其多

古劍賦

吳季有劍古所服兮先時利行後伏匿兮歷世十百神
物來兮精英上浮久乃識兮截截庚庚玉理仄兮質化
光泯黝正黑兮匡視白日澹斂色兮燧人司金石水泐
兮終古不磨奇雄特兮勿褻勿試靈具戒兮鬼目睽睽

頭髻髻兮竊擬窺之自造慝兮靈怒殛女不女貸兮神
宮無人帝湛默兮季冠如山采衣翼兮長身好脩又正
直兮稱是容佩有加飾兮魚室珠橈雜文織兮虞于帝
傍順降陟兮握竒中運授神職兮旋陽制陰物不忒兮
辟却百非五兵息兮大牢不歲完以為德兮變窮于傳
填無極兮

畫枯木賦

夫誰畫此枯樹兮臨不食之散泉既偃蹇又啗食兮骨

岸岸以弗妍想執筆以極思忽機釋而神旋遺衆壞於
暫有勒不毀之所全或墜去於斤運或石泐於溜穿渰
無雨以如晦恍非規而能圓澹黝乎其既失旋蒼然而
在前命以物而不可孰春秋而論年噫吁嘻被革以毛
膏膚用丹皆為流眩頤常注歡獨何為托寂寞於無意
而刻畫其不傳者邪

木齋賦

奎章閣藝文監秀才方積昔在匡廬讀書羣木之間謂

之木齋余愛其高秀而賦之其辭曰

夫何硤硤以差莪兮據積水而鬱盤有梗楠與豫章兮
翳松柏之丸丸攬芳草之盈庭兮聽呦呦之鳴鹿濯余
纓於滄浪兮沐余髮乎飛瀑余潔清以有待兮歎望之
而彌高絳余驂以弗馳兮氣緜薄而心勞感春物之芳
葩兮又晚實之不食更千歲其未已兮退自脩乎茲室

操

思魯琴操

龜山之陰陰兮有雲垂天河目而海口兮將見其人望
之彌尊兮即之彌親大音寥寥兮中信而真

芝亭永言

古詩四言

味經堂詩

有序

國子祭酒魯公伯子翬父作味經堂自為記以勗其
子遠公嘗命遠從予遊故賦此詩

維昔玄聖有子過庭學禮學詩詔之丁寧面牆之室繇

金史卷一百一十五
卷一
不知味親能使學不能使嗜觀于德容聽于德音詠歌
周旋實悅我心邈乎千載聖往言在舍而不求匪罔斯
殆畏友輩公窮經篤行既有諸躬思貽厥成既蓄既畚
俾稼之食既畋既漁俾鼎之實作堂高明曰子遠來吾
經在茲遠其味之始余虛羸匍匐來食茹草飲血以禦
朝夕窮人得歸自我父師俛焉斯文老至不知煌煌靈
芝如彼嘉玉薄言采之在彼中谷南陽之人來詹來言
君子豈弟宜其後昆

題宋誠甫侍郎垂綸亭

岷源建高駛無游船漢會其委安流滔滔爰有君子垂
綸其下雖不得魚意甚閒暇援藟引楫至于中沱蔭樹
以休悠悠永歌逝波沄沄不轉維石樂茲忘憂矢言不
食蒸然雲興風舉以高馳翔中天遺景九臯木其落矣
魚亦潛渚睠言夙好除于風雨風吹衣裳彼為栖栖行
吟望予實勞我思山有榛棘河有鯉鯉豈其飲泉必泠
之美君子冠純秩秩大經洄有清酌可以濯纓

高彥敬青山白雲圖

兩崖之間曾不容舠白雲悠悠與山俱高

趙忠簡公祠堂詩

皇元至順三年春解州聞喜縣學用禮部符祠其鄉
先生故宋丞相趙忠簡公公六世孫國子博士貧翁
求虞集作迎送神詩

山河邈悠宗國為虛騎箕來歸懷此故都鳴臬在樹飢
鯁在渚閔宮不存公食無所董澤之陂有蒲與荷子孫

具來式燕以歌瞻彼洛矣其水泱泱斯文在茲俾也可忘
秦檜既貶趙公於海南隨使人逼殺之公臨終從
所寓寺僧索素帛一方書其上云身騎箕尾歸天
上氣作山河壯本朝以付寺僧而絕聞喜之董澤
公鄉也

賦衛節婦王夫人

汎汎淇水岸有佳竹閨門嚴嚴樂爾貞獨泛泛淇流岸
有松舟閨門閒閒樂爾貞幽汎汎淇右有堂孔阜娟娟

貞幽肅肅眉壽淇原有泉可濯可沿亨薦勺尊樂爾高
年高年樂止亦有孫子式歌衛風以告國史

題學易齋

其人將
詣孔林

惟學易君子慎其齋居動息有存起處是於奇耦玩畫
方員視圖畫循靜始夜根動初罔不在中日居月諸乃
秉元化以時盈虛共惟玄聖啓我後愚載瞻巍巍魯林
鬱如

古詩五言

護草生竹間

護草生竹間翠色相綢繆美人欣有託君子故忘憂昔
聞有鳴鳳飲水來丹丘不食衆木實樂只淇園秋

高竹臨水上

高竹臨水上幽花在崖陰以彼貞女姿當此君子心春
陽不自媚夕露忽已深湘妃昔鼓瑟悵望蒼梧岑

月出古城東

月出古城東海氣浮空濛車騎各已息宮闕何穹窿牧

馬草上露吹笳沙際風帳中忽聞鴈傳令穀雕弓

書上京國子監壁

神京極高寒幽居了晨夜雷風無時發零雨每飄灑炎
光不到地蕭爽度長夏大化漠無宰豈必事陶冶揚雄
不曉事守道栖栖者玄經百無徵白髮謾盈把

至治壬戌八月十五日榆林對月

日落次榆林東望待月出大星何煜煜芒角在昴畢草
樹風不起蛩蛸絕啁唧天高露如霜客子衣盡白羸驂

齟餘棧發婦泣幽室行吟毛骨寒坐見河漢沒驛人告
晨征瞳瞳曉光發

憶三十年前與元復初參政同賦秋日梨花元有
句云朝食葉底梨莫看枝上花而忘其後句因
續之云

朝食葉底梨莫看枝上花花開食實後霜風振長柯遠
水良可鑒彩雲亦易過念爾白於雪日暮當如何

李老谷

金史卷一百一十五
卷一
十轉山崦交九度沙磧溜始辭平漠曠稍接山木秀老
病畏行役慰藉得良邁秋嶺晚更妍寒花畫如繡故園
夫如何朝陽眩霜袖

秦定甲子上京有感次韻馬伯庸待制

翰音迎日轂儀羽集雲路寂寞就書閣老大長郎署為
山望成岑織錦待盈度我行起視夜星漢非故處

賦水木清華亭

中流泛蘭舫望彼嘉樹林落日蕩野水浮雲生夕陰游

魚戀芳藻好鳥鳴幽岑為樂恐易老吾將脫朝簪

天厯戊辰前續詠貧士一首

目昏畏附火枯坐寒窻中破褐著絮重虛豆兼冰崇病
骨於此時浮屠屹撐空呼兒檢餘厯記日待春風雖欣
解凍近翻驚紀年窮貰酒欲自廣無錢似陶翁

又一首答舍弟見和

蜀侯昔罹憂嶺海萬死中詩書庶不泯焉思祿位崇爾
來五十年所以恒屢空涉世惟信道卓然立頽風漫仕

非我能偶貧豈人窮深耕定有穫歸嘆兩衰翁

後續詠貧士四首

老骨寒不寐夜長况聞風心悸危欲折跼蹐敗絮中鷄
鳴當晨參馬疥芻不充山童衣百鶉喚之愧匆匆求火
掃木葉庭樹亦已空決起不敢怠曙光屋南東苟遂牛
馬性歸放春草豐

歸蜀越關隴棧閣危登天適越河濟隔堰水丈尺間飢
寒迫旦暮舟車計茫然東家有一叟欲去初不言早朝

聽詔畢喚馬閭闔前童奴受宿戒向暖相爭先聞之嗔
兒子我何為汝牽屨無千金價吾足安暇憐

為政貴察色讀書在研覃司視既不明兩者無一堪尚
不遑吏責為師固宜慚聖世無棄物况茲久朝簪決去
豈我志知止亦所諳頗聞南山下菊根浸寒潭濯餌干
日期冰臚復清涵老馬果識道更服鹽車驂

天風夕號怒霜日殊清妍探架得古書前日手所編奈
何視茫茫字若萬蟻緣精意成寂寞惆悵還棄捐於惟

仲尼衰清夢不復然小子未聞道何以卒歲年

觀花有感

掛巾花樹枝酌酒花樹下風吹巾上塵花落手中尊清
唱起相壽毋遽且聊暇流光急去人莫怪行樂者

赤城館

雷起龍門山雨灑赤城觀蕭騷山木高浩蕩塵路斷魚
龍喜新波燕雀集虛幔開戶微風興倚杖衆雲散

同閣學士賦金鴨燒香

黃金鑄為鴨焚蘭夕殿中窈窕轉斜月逶迤動微風綺
席列珠樹華鐙連玉虹無眠待顧問不知清夜終

退直同柯敬仲博士賦

月下白玉階露生黃金井疎條栖鵲寒蕙流螢冷戀
闕感時康懷歸覺宵永晨鐘禁中來白髮聊自整

送良上人賦得井上桐

桐陰秋轉薄井氣曉為霜交柯舞幽鏡墮葉響鳴璫高
巢翠羽下澄水玉蚪藏上人從定出行吟繞石牀

送吳子高

懷寶獻京國悼亡還獨歸
日落雲中樹風吹江上衣
湘靈瑟在席織女石支機
遠道多寂寞強飯勿相違

于仲元舍賦紅梅

白雪不成夜丹霞遂崇朝
妙質承日映飛英向風飄
醉來紅袖近歌罷綵雲消
揚州問何遜何似董嬌嬈

寄題新冶亭

窈窕冶亭莫蕭條江南秋泛覽
山河外張樂鳳凰丘公

子飛翠蓋美人回綵舟從茲至黃髮樂哉以忘憂

題儋耳東坡載酒堂

翳翳儋耳城歷歷桄榔樹百年遺故丘新堂設賓隙清
風海上至朝陽在庭戶丹山五色鳳覽德屢來下甘辛
熟桂酒羅列雜譖貲苻黎多孫子食飲祭先具蛟龍波
浪深歸來風雨除

鑿井得甘泉渴者恒自私流潤不擇地委順復何疑海
南絕風雨水木况華滋隣舍解讀書諸生還誦詩何必

懷故都聊樂宜在茲星河度白鶴山月懸蛾眉來晚去
何速勞人千載思

盜發亞父塚

彭城有盜識寶氣於亞父塚上發之得一劍云

盜發亞父塚寶劍寶累之塚開寶氣盡獄吏書盜辭盜
言惟見寶寧知亞父誰項王不相信弟子遂與尸黃壤
下深銅千歲復何為大河繞城東落日在城西過客立
城下踟躕望安期

應制題王拙畫吳王納涼圖

雨過太湖上風生響
廡廊紅綃拂几席
白苧製衣裳
朱光淪厚地
明月在高堂
何以保玉體
長年樂未央

步虛詞四首

步虛長松下流響
白雲間華星列燿火
明月懸珮環
肅然降靈氣
穆若愉妙顏
竹宮澹清夜
望拜久乃還

稽首望太霞
離羅間層霄
綢緼結冲氣
要眇出空謠
前參干景精
後引務猷收
攝衣上白鶴
招搖事晨朝

朱光出東海
高臺迎赫曦
六龍獻陽燧
九鳳保金支
鍊

丹軒轅鼎濯景崑崙池拜賜冰玉佩玄洲共遨嬉
學仙淮南王問道劉更生三年鍊神丹九載凌上清日
月作環珮雲霓為旆旌回首召司命靈雨灑蓬瀛

題商學士畫

方士好服食商山多紫芝采之長松下濯以清澗漪滄
涼百里內秦皇都不知駕舟載男女築宮東海涯

贈藝監小吏

廣術何迢迢榆槐蔭蔽之鼓鐘晨莫起車馬中間馳此

有嫠居者閉戶教孤兒十歲學文史十五從吏師丹青
出天性落筆有令姿藝監取材伎小大無一遺署兒筦
庫下祿薄不足為手持一束書求以慰母思告兒勿薄
吏公卿出自茲請看孟氏里軻母自有祠

記子昂畫

春風動蘭葉庭戶光陸離言收竹上露石角掛練衣車
行不擇路采苾何楚楚遊子愴忘歸徘徊歲云莫

送西臺治書仇公哲

陝郊得時雨生意始來復存者事稼穡還者葺牆屋安
知凋瘵餘政可致新福闢除正廣術區井表深瀆均齊
定恒志忠厚保敦篤豈無憂世士受仕在芻牧為義苦
多違好名常不足治書肅將指善類庶有勗

送張道士歸上清

白雲盱水上自古多仙人手攜綠玉杖頭戴白綸巾袖
中出風雨天上禮星辰歸來庭戶靜芳草自生春

日出行

日出上城府日莫當蚤歸城門已擊拆出郭何焉依下
馬投館人空垣月當扉涼風振庭樹巢鳥屢驚飛起坐
搔白髮忽如霜草稀周公不復夢仲尼故沾衣老萊有
孺色傳聞惟食薇求之事已晚徘徊行道微

贈治冠者

車馬入隘巷言尋治冠師反關不受客高坐哦書詩布
衣不掩脛晝食甘藿藜冠成動經歲不售亦不辭我少
好文章把筆無不為愧爾爰寂寞慎與當自茲

贈寫真佟士明

佟郎居上京閱人如風花拈筆寫其似千歲留英華邇
來七十年將相紛在目來者有如此往者那可續昔我
初北遊面白鬢如鴉點染煩粉墨華星映丹霞今如雪
中松苦硬雜蒼白却視當年容邈如不相識不識當如
何臨風且長歌黃雲接河漢白雪漫陂陀乞身願歸老
吳蜀山總好贈君千黛螺翠色秋可掃

寄陳衆仲助教上都作

學省足清晝詞垣驚蚤秋美人隔河漢落月在高樓持
衣未成曲吹笛不勝愁還趨鳩鵲觀別製鸛鷀裘

贈鐵菴道者二首

昔遊雲臺觀山色上衣青松花春雨落栢葉秋露零飢
來煮白石睡起看黃庭人間忽已老莫問少微星
海上別妻子山中求茯苓白虎戲玄渚蒼龍護黃局燒
香招五老行厨庖六丁從子似非遠丹霞粲華星

題商德符華山圖

昔祠雲臺館行穿御階栢夕陰嵐氣深重碧照行客獨
訪張超谷漸覺巖巖險迫冰生玉井頭日射仙掌側豈無
鐵鎖懸翻身若飛鵬恐煩華陰令不奈昌黎伯王事況
有程車馬何忽忽流觀終南山周覽天府國爾來十七
年欲往不再得山河想邈悠傷殘轉蕭索摩挲商老圖
彷彿希夷宅高哉蓮華峰白雲澹秋色

寄幻菴主者

朝遊武夷麓莫入匡廬岑放舟臨野水采藥過幽林清

泉磨寶劒磐石鼓瑤琴臘月歸溪上還作早春吟

賦茅山道士雲松巢

昔年李太白廬山思結巢褰雲自天上和鶴止松梢道
士潘閒遠高居古大茅誦經門卧虎看劒石眠蛟飛步
脫鳬舄長吟吹鳳匏九江覽秀色許爾作神交

酬上清道士鈔陰何詩

殘雪松上落輕冰硯裏生寫詩過夜半歌枕又天明少
陵愛何遜太白似陰鏗不愁勞弱翰亦足動高情

題李溉之學士白雲半間

山中多白雲何由到城邑
招之恐不來欲攬遽無跡
栖檐候晨光納牖作秋色
用沖不為盈常住寧若客
分張任蒼松散落還白石
日照香爐峯月射仙掌側
有恩封一鄉與子當共食

題浴日觀

煌煌赤老鳥三浴乃出海
波濤始沆瀣宇宙破冥昧
西登泰華巔東望方丈外
稽首希夷翁今晨慶良會

為范尊師賦雲林清遊

大茅千仞下結屋三四楹
雲林戶牖潤鶴去海天平坐
上發長嘯人間聞玉笙
斲苓春霧重煮朮晚烟輕
綠室虛丹氣蒼崖受日精
樵遺伐木斧真降引霓旌
九鼎金還就千齡樹不傾
問誰解居此云是范長生

吹笛圖

白雲悠悠去長松披高丘
匡坐吹笛人似是馬督郵
飛鴻遺哀響幽泉發春流
女樂亦何有消搖以忘憂

送甘以禮調官歸鄉

甘君有良材於政無不宜白頭郡縣下尚覺非所施奈何筦庫冗而可紂吏師豈直名吏師積學本書詩高情抗浮雲廉節濯清漪君子安所遇固無喜愠辭嗟我忝從官簪筆恒殿帷竟無國士薦徒稱故舊知晚歲向田里藜杖相追隨尊酒以怡老未為負明時

送李彥方閩憲

文監李公彥方出貳閩憲同朝羣公皆賦詩以為贈

彥方屢擢臺職激揚之宜有不待予言者適有一事
深有感於愚衷先正魯國許文正公實表章程朱之
學以佐至元之治天下人心風俗之所係不可誣也
近日晚學小子不肯細心讀書窮理妄引陸子靜之
說以自欺自棄至欲移易論語章句直斥程朱之說
為非此亦非有見於陸氏者也特以文其猖狂不學
以欺人而已此在王制之必不容者也閩中自中立
之歸已有道南之歎仲素愿中至於元晦端緒明白

皆在閩中不能不於彥方之行發之去一賊吏治一
弊政不如此一事有以正人心儒者之能事也集卧
病目眚尤甚援筆書此云

七閩去天遠顛連苦無告牧人受深寄昧者覆為暴犀
象雜金貝飢渴劇飮膏大言相鄙夷饜奪心自忼豈無
循廉吏實病黑白撓聰明屬旒黠聽瑩資所到李侯金
閩彥圖史擅讎校晨聞大夫奏夕理武夷棹君子慎脩
職寧適豐廩稍蕉荔甘多毒薑桂老堪笔所懷延平翁

楊休似明道授受有源委精微足探討言立聖如在表
正愚可造師匠久不興真妄如杓鑿云何謂支離肆誕
長亮傲異言古所誅末學足深悼閩雖在海隅前聞此
淵奧正誼從簡編良俗宜善導贈言不及他持此永為
好

題鄭秀才隱居

陶翁昔好菊荒徑不暇鋤素琴初無絃名酒亦屢虛雖
有二三子薪水不讀書淒涼千載下高名將焉如不如

鬼谷洞鄭子樂有餘種菊以為田田中更為廬善樂不
二價詠觴送居諸有子揮五絃涼風在庭除時來青田
鶴亦出濠梁魚昨者遊京師侯門曳華裾捧檄忽一喜
翩然告歸與芳蒲采甘露玉漿釀清醕老父坐堂上稚
子具籃輿晨遊南山陞暮濯清水渠席間撫猗蘭房中
詠關雎以此得高壽何必南陽居

題朱邸竹木

猗猗淇園竹結根盤石安枝幹相扶持風雨不可干其

寶鳳所食君子思保完恒恐聲影疏蕭條霜露寒金玉
慎高節千載承清歡

詠史

軒后邈已遠漢武亦雄哉荒忽九州外百年過煙埃變
化庶長久臨海築層臺黃金靡鏤飾喬林摧斷裁樂通
竟先死孫卿殊未回不知作者意空令來者哀秦盤泣
繁露馳道殷奔雷志氣昔所在風雲恒往來

畫古木

荒郊卧蒼苔蛟龍在其上不知風雨來垂影一千丈後
主撥鐙法江南久寂寥空令沒骨畫容易媚中朝

賦蘇伯脩滋溪書堂

滋源恒伏流春雨川乃盈林疇廣敷潤草木俱繁榮臨
深見遊儵仰喬有鳴鶯君子樂在斯齋居托令名積學
抱沈默時至有攸行抽簡魯史存採詩商頌并禹穴追
馬公湘江歌屈生紉蘭不盈握伐木有餘情浩然欲浮
海歸興還濯清方舟我為楫白髮愧垂纓

題薛外史瓊林臺

高臺積方石瓊林樹交柯
晨光眩白雪夕景纏紫蘿
每聞樵子唱恐是仙人過
塵世在足下豈能聞笑歌
過海祇騎鶴開池還養鵝
外史政瀟灑太白烏足多

送張兵部孟功巡河分題得屋上烏

花發上陽春門開未央曙
城柝起羣栖流光散朝羽
息影須近檐結巢願當戶
轆轤轉金井終日灌嘉樹

題彭澤陶氏家譜

百甓在戶外五柳當門前
燕去王謝宅人依墟里煙
述德尚千載人情猶昔年
以安遺孫子高哉為世賢

道園學古錄卷一

欽定四庫全書

道園學古錄卷二

元 虞集 撰

芝亭永言

古詩七言

賦洛川老人九十

洛川老人年九十鬚眉如畫身玉立錦袍金帶方烏巾
手挽強弓無決拾八月平原秋氣高聞有狡獸依蓬蒿

清晨上馬薄暮返累騎毛血懸韃囊身是前朝將家子
生逢太平百無事都將英氣化高年何物小兒堪指使
太守上言朝有恩束帛養牛兼上尊洛川老人過百歲
擊壤為歌傳子孫

張令鹿門圖

張侯襄陽人深知襄陽樂十年宦學懷襄陽故托豪傑
寫山郭老我不樂思蜀都人言嵩陽好隱居三十六峯
常對面水竹田廬還可圖欲往不能心惴惴忽見新圖

被山惱沙禽浦樹俱可入金澗石牀為誰好向來耆舊
皆英雄駕言從之道焉從弄珠月冷識遊女沈劍潭深
知卧龍八月霜晴水清淺聞道扁舟足迴轉何時古寺
傍檀溪幾處殘碑在江峴呼鷹臺高秋草多養魚池中
蓮茨波蜀嵩未必不如此我今不遊奈老何張侯張侯
蚤結屋莫待史詹為君卜要看壠上課兒耕好在魚梁
白沙曲

子昂畫馬

憶昔從公侍書殿天閑過目如飛電池邊儘有吮豪人
神駿誰能誇獨擅公今騎鯨隘九州人間空復看驂騑
惟應馭氣可相逐黃竹雪深千萬秋

湛湛行

湛湛天宇玄以黝星白如銀垂近人牛羊散漫草多露
大帳中野傍無隣去年八月羽書急婦女上馬小兒泣
今年八月天子來身屬橐鞬月中立

家兄孟脩父輸賦南還

大兄五月來作客八年不見頭總白五人兄弟四人在
每憶中郎淚沾臆我家蜀西忠孝門無田無宅惟書存
兄雖筦庫實父蔭弟竊微祿承君恩文章不如仲氏好
叔氏最少今亦老五郎十歲未知學嗟我何為長遠道
諸兒讀書俱不多又不力耕知奈何憂來每得二三友
看花把酒臨風哦蜀山嵯峨歸未得盤盤先壠臨川側
碧梧翠竹手所移應與青松各千尺南風吹雪河始冰
兄歸烏帽何稜稜明年乞身向天子共讀父書歌太平

子昂墨竹

吳興畫竹不欲工腕指所至生秋風古來篆籀法已絕
止有木葉雕蠶蟲黃金錯刀交屈鐵大陰作雨山石裂
蛟龍起陸真宰愁雲暗蒼梧泣湘血吳興之竹乃非竹
吳興昔年面如玉波濤浩蕩江海空落月年年照秋屋
商德符畫幽篁古木

湘君宮在洞庭湖幽篁古木龍所都石壇雨長碧苔蘚
水屋風動青珊瑚老人欹枕看螻蟻嫠婦停舟聽鷓鴣

江南蜀道間來往商公商公今有無

吳郡陸友仁得白玉方印其文曰衛青臨川王順
伯定以為漢物求賦此詩

將軍騎從公主時豈意刻玉為文章
袿襦已隨黃土化此物還同金鴈翔
軍中只識長平侯西風木葉茂陵秋
人生卑微何可忽碌碌姓名誰見收

為達兼善御史題墨竹

蜀道荒涼多古木篋簪千尺相因依
小年慣見今白髮

杜宇夜啼愁不歸老可嘗作陵州守古墨蛟龍多入手
春雷每恐破壁去神鼎空令夔魅走丹丘越人不到蜀
脩葉何以能縱橫內府人家爛漫寫使可見之心亦驚
江南御史龍頭客暫別那能不相憶知君深識篆籀文
故作寒泉溜崖石

畫鶴

薛公少保昔畫鶴毛羽蕭條向寥廓通泉縣壁久微茫
故物多非況城郭長鳴濶步貌閒暇解寫高情亦奇作

田中芝草日應長石上松花晚猶落赤壁江深孤月小
白雲野迴秋霄薄羣帝相從絳節朝八公許製黃金藥
誤櫻塵網跡易迷移召中洲夢如昨借懸素壁憶真侶
忽有微風動林壑碧虛寥寥積雪高直過蕭臺絕栖泊

題畫

棠梨生竹間牽牛引蔓相因依晨華墜露天水碧斷蘚
絡石爛斑衣鷓鴣踏枝歲將莫蟋蟀在戶人當歸蕭條
落墨人間稀吁嗟乎蕭條落墨人間稀

寫廬山圖上

憶昔繫船桑落洲，洲前五老當船頭。
風吹雲氣迷谷起，霜墮楓葉令人愁。
高人在第九疊，太白一去三千秋。
石橋二客如有待，裹茶試泉春巖幽。

題旦景初僉司畫

旦公山堂城南畫圖古，檜何毵毵城中無。
山有山癖直藉豪墨窮幽探，旦公彈琴古檜下。
鬱鬱窗戶生晴嵐，春雨時來鶴鳴谷。
秋聲夜作龍吟潭，先皇畫坐羣玉府。

內使趨召飛雙驂畢宏章偃出中秘營丘北苑開藤緘
是時旦公主舒卷一二文士相交參旦公歸來坐成想
亦頗拈筆為梗楠伯熙奉詔每有作礪柯相並將無慚
嗟予懷歸亦已久摩挲老目百不堪山中豈乏真偃蹇
可容白髮抽朝簪

題柯敬仲畫

予先世居隆州州治之後山石室翁守郡時隆為陵
州州事簡時來就吾家拾故紙背作茅蘭竹木之

屬所得頗多吾幼時尚拾得數紙今亦亡之丹丘
生用文法作竹木而坡石過之近又以新意作墨
花甚妙從子悅有眉山學官之行丘為作此予愛而

賦之

昔者老可守陵州守居北山吾故丘太守時來看山雨
每畫紙背成滄洲老蒲松煙色過重揮霍陰崖交劍矛
百年離亂亡故物敝篋江南誰復收新圖竇管枝葉脩
使我不樂思昔侯碧雞祠前杜鵑叫玉女井上叢篁幽

棠梨樹高青子落碧花翠蔓榮牽牛楊雄無家不歸老
蟪蛄蟋蟀寒相求丹丘先生東海客何以見我空山秋
蕭條破墨作清潤殘質刊落精英留陂陀重複分細草
山石縈紆生亂流眉山學官莫厭冷言歸故鄉非遠遊
石田茅屋倘可得萬里欲上東吳舟百花潭深濯新錦
持報以比珊瑚鉤

白翎雀歌

烏桓城下白翎雀雌雄相呼以為樂平沙無樹托營巢

金史四庫全書
卷二
八月雪深黃草薄君不見舊時飛燕在昭陽沈沈宮殿
鎖鴛鴦芙蓉露冷秋宵永芍藥風暄春晝長

敬仲畫扇

松根茯苓如石髓服食令人壽千歲子欲求之觀此圖
老身偃蹇枝扶疎長鑱篝火新雨霽羽人丹丘期不至
却剪蒼筤崖石間吹作龍吟秋滿山

題簡生畫澗松

簡生與我皆蜀人留滯東南凡幾春每拂齊紈作山水

使我感慨懷峨岷如此長身兩松樹滿谷悲風散陰霧
雌雄如劍變為龍鱗鬣齊成擘崖去秘閣嘗觀韋偃圖
蒼潤雄深世所無默識形神出模畫把筆莽蒼增嗟吁
玉堂寶書本同館官府既分難復見摩挲新墨慰衰朽
鬢雪飄蕭數開卷昔我樵牧青城山坐起政在雙樹間
當時簡生若相見應并寫此聽潺湲劉郎集賢好賓客
好著幽窻對晴碧凌雲為我哦七言有鶴飛來破秋色
題李受並承旨作東平章萬戶繼志堂後

金史四庫全書
卷二
將軍腰間黃金符父兄功成百戰餘太平不復事弓馬
秋雨高堂間讀書門有喬松墓有草永言思之願終保
幙中賓客誰屬文東魯儒生國元老

題柯博士畫

磯頭風急潮水長蒹葭蒼蒼繫魚榜青山一髮是江南
白頭不歸神獨往幽篁繞屋茅覆簷木葉脫落秋滿簾
買魚沽酒待明月定是黃州蘇子瞻子瞻文章世希有
謫向江波動星斗夜投斷岸發清嘯栖鶻驚飛怒蛟吼

圖中風景偶相似欣然揮洒春雲開子瞻應是念鄉里
還化江東孤鶴來

題高彥敬尚書趙子昂承旨共畫一軸為戶部楊
侍郎作

不見湖州三百年高公尚書生古燕西湖醉歸寫古木
吳興為補幽篁妍國朝名筆誰第一尚書醉後妙無敵
老蛟欲起風雨來星墮天河化為石趙公自是真天人
獨與尚書情最親高懷古誼兩相得慘淡酬酢皆天真

侍郎得此自京國使我觀之三歎息今人何必非古人
淪落文章付陳迹

題灤陽胡氏雪溪卷

去年予與侍御史馬公同被召出居庸未盡東折入
馬家甕望縉山度龍門百折之水登色澤嶺過黑谷
至于沙嶺乃還道中奇峯秀石雜以嘉木香草輦道行
其中予二人按轡徐行相謂頗似越中但非扁舟耳
適雨過流潦如奔泉則亦不甚相遠郭熙畫記言

畫山水數百里間必有精神聚處乃足記散地不足
書此曲折有可觀恨不令郭生見之灤陽胡太祝乃
以雪溪自號豈所見與予二人同乎然灤水未秋水
已堅尋常已不可舟况雪時耶當具溪意云耳因為

賦詩云

積雪平沙陰山道射虎殘年不知老豈識船如天上坐
翠竹為帷樹為葆昔乞鏡湖苦不早白髮如絲照清潦
它年此地若相逢應著漁蓑脫貂帽

題楊友直檢校所藏李營丘枯木圖

老龍出海蒼髯鬚營丘枯木天下無
回枝屈鐵墮崖雪澗底應拾青珊瑚
明堂清廟要梁棟朔風吹沙澤腹凍
老身不用嘆遲莫按圖來求萬鈞重

題詹圃老梅圖

鄉人共識古梅樹移植詹亭仍百年
計時當生宣政前僻遠幸遺花石船
昔僑寶唐尋故物石樓嵯峨白沙白
陵陽慈竹樂公移根節相扶俱遠客
此樹乃在隣邑間

看花食實真足閒人言支離故多壽我意培植茲惟艱
華蓋高人世師表為爾賦詩歌窈窕詹家孫子多讀書
早晚春雷化龍矯

酬蕭侯送蒲萄

蕭侯昔致蒲萄苗山童不灌三日焦宛西上品復親致
手種窗南自澆水一月當生一尺長移向江頭薜荔牆
秋深雨足馬乳重舉囊石壓青霞漿是時蕭侯當走馬
來訪衰翁茅屋下酒酣舞劍傾一尊不信金盤露如瀉

題衮塵騶圖

驂騶食粟石每既立仗歸來汗如洗脫羈展轉聊自恣
落花塵土隨身起君不見春雷起蟄龍欠伸霧擁雲蒸

九河水

律詩五言

林臯亭

九月天氣肅鶴鳴在林陰使君甚好客來者總能吟紅
樹秋山近黃華夕露深隣翁八九十有酒即相尋

題子昂長江疊嶂圖

昔者長江險能生白髮哀百年經濟盡一日畫圖開僧
寺依稀在漁舟浩蕩回蕭條數根樹時有海潮來

挽胡伯恭令尹二首

二十南陵薄才名舅氏同千金劍客散一棹酒船空朱
紱稱循吏安輿已病翁神明盡今日嘆惋謾羣公

病起思歸日齋居卧治時抱孫方在膝反席遽如遺江
路牽愁遠坊門望到遲遙憐賢弟哭未忍老親知

題雪谷曉行圖

踏雪度嶙峋霜髯跨玉麟
前瞻那有際後至豈無人
松樹紛紛老梅花的的春
金烏海底出遍界爛如銀

送先隴二隣僧還吳二首

蘭若背山陰松筠夾逕深
門閒容虎卧湖近聽龍吟
雨過泉添澗風飄磬出林
衲衣皆舊識一一謝幽岑

東嶠憶招提幽尋日未西
過山隨虎跡倚石待猿啼
雲外催歸錫松間覓舊題
卜隣吾欲老毋惜伴扶藜

節婦王夫人劉氏

憶昔中丞在清淳古道存節高賢女弟文托外諸孫慈
竹宜家慶桓楹表國恩燕秦鬱相望美俗繫人門

次韻阿榮存初參議秋夜見寄

寓館城門夕高秋雨露開天垂華蓋近月轉紫垣來疏
濶思良會淹留到不才深期謝安石揮麈散風埃

雪谷早行

積雪擁柴門行人稍出村溪頭或遇虎木末不聞猿接

棧迴山閣支橋就樹根驅車上重坂回首見朝曦

雪巖樓觀

高閣丹青起中天紫翠分窻當太白雪門俯九疑雲伐
木山人去吹簫帝子聞塵中歸未得春思轉紛紛

送人之劔閣倅

往年登劔閣快馬著春衫設險懷前賦磨崖覓舊劖鄉
人遊雪界郡倅試冰銜歸道觀新政春江不掛帆

寄子山尚書

竹色侵衣碧重簾
雨氣深白鵝翻墨
沼紫燕入書林北
海春尊側西山夕
閣陰東曹公事少
歌舞散黃金

漫興

雨閣添衣潤風簾
隱几高白頭更事
少病目向書勞南
客傳音信東家問
酒醪江邊茅屋破
歸楫若為操

送張尚德

史館薦張尚德為
檢閱官朝廷以為
宜稱可其請未
奏也有司以闕簿
注新進士尚德頗
有聞即斂裳宵

逝噫進退若是可以信史館之薦人矣予力雖不足
以留之亦終不敢失之也故作詩以餞之

六月初聞雨官河潦水生江南歸宋玉稷下謝荀卿鵬
鶚青霄迴兼葭白露盈都留詩興在來聽上林鶯

寄丁卯進士薩都拉天錫

鎮江錄
事宣差

江上新詩好亦知公事閒投壺深竹裏繫馬古松間夜
月多臨海秋風或在山玉堂蕭爽地思爾佩珊珊

送趙繼清令尹之官安陸

雲夢開七澤陪尾貫連山為政煙塵表吟詩松竹間故人總華要令尹獨清閒文學偏宜老母愁鬢髮斑

明皇按樂圖

新度霓裳曲三年教得成驚鴻渾不下飛燕若為輕芍藥春亭莫芙蓉野水生梨園多白髮吹笛到天明

送長沙守

白髮長沙守循良又好文近辭金馬去遠有玉魚分對竹聽湘雨開簾看嶽雲漢廷思賈誼一飯莫忘君

送趙編脩祀西嶽江瀆

西道祠官去東風入旆斜汾陰已歸鴈江水正飛花歲
事聞宜穀鄉人喜過家老來思故里欲寄使君車

代衆仲作

昔在泉州住將軍每見招春雲山對屋夜雨水平橋池
鴨穿荷葉溪魚上柳條禁城鐘鼓起車馬晚蕭蕭

題宋雲舉太常臨汾二節婦序後

許氏姪從姑相承患難餘自傷還自誓同志復同居白

髮冰霜共丹心鐵石如有關名教重珍重太常書

送王照磨之官雲南

遺廟珍珠浦歸舟熨道溪飛鳶愁暑雨走馬畏山泥官署尊丹鷺祠官勝碧鷄題詩遠相送紅日五雲西

玉堂燕集圖

朝廷多暇日別館又青春薄醉猶催酒清歌況有人玉堂金硯匣翠袖白綸巾老去渾無賴憑誰為寫真

寄答桂風子先生

卷二
深隱廬山裏題詩忽見存風高應跨鳳月落更聽猿酒
熟邀皆去丹成笑不言雲屏第九疊相與浴晨暎

寄莆田先生

懸榻塵生席深居晝下帷齊眉安饋食擁髻近歌詩藥
裏須鍾乳書題憶荔枝白頭吟更苦何必蜀人思

鄭谷圖

道士徐太虛生紙畫山居林壑春煙裏桑麻夜雨餘過
橋九節杖連屋一牀書自是子真谷歸耕三月初

畫檜

茅山多古樹此檜更長生
鶴鶴棲來穩蛟龍化得成
雲深還近戶月落似聞笙
千載如相見蒼然故舊情

李員嶠墨竹

河東李學士隨意放洋州
月落亭陰迴雲生谷口幽
江濤空渺渺筆墨更悠悠
蕭灑西清地令人憶舊遊

為歐陽少監題宋好古竹

幕中能寫竹作此雨瀟湘
出石根還瘦臨溪影更長
班

金匱要略卷二
班稚子立一一鳳雛將日有長安使平安問老蒼

贈楊友直

雒陽楊友直字儼漢中郎畫若錐穿石垂如雨漏牆舞
花羞女美醉草笑僧狂昨日鴻都學煩君寫數行

題朱邸竹木

江上復春雨層陰覆碧波石高龍影卧林迴鶴聲過解
佩倚蘭浦揚舲落木坡佳人翠袖薄日暮欲如何

寄阿爾和學士

問訊東泉老江南又五年涼風鳴步屨明月棹歌船陪
講長懷舊還朝獨後賢治平二三策蚤晚玉階前

赤壁圖

過鶴生新夢攜魚憶舊遊清霜凋木葉落月湧江流隱
者時堪訪良田亦易求如何玉堂夜白髮不勝愁

題况肩吾縣令贈行卷

縣庭都禁謁祇許見諸生接壤皆興學遊民亦願耕絃
歌居室迴山水畫圖清千載雲巖石能留令尹名

送朱萬初之廣東照磨

聖主多清暇臨池愛日長
天章垂鳳彩雲氣動龍香
進諫慚簪筆爭書敢近牀
承恩君最蚤服玉向炎方

八月八日有感題視草堂壁

載筆趨芸閣探囊索縕袍
坐銷秋日淨心折夜風高
識字頭先白謀生計轉勞
文園多病渴常想賜蒲萄

賦程氏竹雨山房二首

春雨過山竹幽泉繞舍鳴
燕泥書帙晚魚浪釣絲晴奉

席從孫子連牀總弟兄
舊聞林下叟讀易到天明
遊子聞春雨思親望故園
竹間開几席花底注山尊
累世書連屋頻年稻滿村
卜鄰淳樸地絕學欲重論

戲作試問堂前石五首

試問堂前石來今幾十年
衰顏空雨雪幽致自風煙
微醉寒堪倚孤吟靜更眠
舊湖春水長誰繫釣魚船
為問堂前石何年別太湖
春風神不王夜月影長孤
豈中明堂柱空遺艮嶽圖
頗思嘉種木歲晚與相扶

為問堂前石何無藤蔓纏金蓮疑可致紫菊若為妍舊
夢遺波浪閒情閱歲年祇緣相識久親為濯清泉

碣石久淪海女媧曾補天乾坤遺叢爾霧雨護蒼然淬
劍龍隨化彎弓虎自全昔賢多賦此誰識最流傳

為問堂前石屢逢堂上人遠來嗟最久獨立與誰隣運
載勞車馬摩挲識鳳麟鑒車書吉日追琢到嶙峋

代石答五首

幸自隣頑鄙毋煩問歲年當寒金作礪向暖玉生煙眉

儻無歸意羊羣有叱眠涼州三百斛亦未酹觥船

昔觀一柱觀還度幾重湖雪盡身還瘦雲生勢不孤
穿鄰臺瓦賦就草堂圖芝閣玄雲在危踪敢藉扶

牛角何堪礪蝸涎謾自纏沈冥辟邪古羞澁望夫妍
神物須清鑒靈根屬小年金輿曾共侍千載憶甘泉

轉徙寧論地存留亦信天露盤危欲折劫火不同然
雖下殘經斷岐陽數鼓全向無文字托寂寞竟誰傳

去歲留詩別嗟哉白髮人冠依子夏製居切左丘鄰
執

金匱要略卷二
簫充振鷺脩辭綴獲麟終須愁坎壈勿用諂嶙峋

送魯子暈廉使之漢中

封上頌臺禮輕車入漢中
節毛吹渭雨木葉動秦風
把酒臺基古馳書歲事豐
朝回倚西閣日日數歸鴻

立春夜試墨

輕雪作春花飛來入鬢斜
紫貂迎曉霧絳蠟炫晴霞
書詔頻趨閣思歸即借車
幾時將稚子隨意踏江沙

蜀人曲江之官贈以墨竹

拈筆寫琅玕清風入室寒蜀山空偃蹇海郡更盤桓雲
霧瓊簫遠冰霜玉節完莫忘鄉里意持向曲江看

正月十一日朝回即事

宮樹春陰合霓旌拂曙來天光臨閣道雲氣轉蓬萊晝
漏沈沈鼓晨尊灑灑盃香霏簾底霧樂殷殿前雷祥瑞
儀曹奏珍淳尚食催舞庭分鷺序效獻過龍媒融雪微
生草輕風不動埃老人南極至王母上方回玉色何多
喜金華得重陪裁詩賀新雨西閣待門開

贈別兵部崔郎中暫還高麗即回中朝

束髮來東海從軍護北門
珠光連旭景玉氣達春溫
淵靜龍含德門嚴虎列屯
從容參帷帳慷慨屬櫜鞬
拜表推黎獻趨朝謁至尊
雲依溫室樹星入紫微垣
不道璫璆貴仍嬰筦庫煩
利行雖近市義守不窺園
眷遇忘身得危難欲手援
懷邦維父母於國實甥婚
駸駸還羈勒源源致壁殄
魯連名竟重箕子教應存
簡在從當日扶持仗宿藩
清宮風肅肅驂乘火煇煇
帝所為郎重王家

報禮敦暫伸桑梓敬未愛李桃繁神闕秋期早康侯畫
錫蕃九成思閣鳳六月待溟鵑

次韻筠軒司徒足成旦公所藏英宗御題之句元
題曰日光照吾民月色清我心又題琴曰至治
之音

化國多長日高人侍紫宸觀書從上相屬筆念生民雲
漢文章備風雷號令新惟應青簡在能載古風淳
御翰龍池曉繡經鸞殿陰雲依清靜葉月印妙明心千

卷二
載堂堂去諸天肅肅臨朱紘誰為鼓至治有遺音

次韻李侍讀東平王哀詩

宇宙生奇變明良陷逆圖傳聞昏白晝悲憤結全區治
極機潛否恩深事失謨犯車仍斷軌壞戶竟傷樞魑魅
嫌明鏡強梁忌雅模甘心成首禍藉口肆羣腴隱忍危
衝決憑陵善唯俞自天篋鉞累月具簞壺裹草疑無
地招魂競出都笳鳴殘夕月馬僨四交衢所痛倉皇際
將無古昔殊腹心何蠱蝕肘腋不支梧列位多翹楚干城

總豹驅詎言歸厄數不復頌貞符天討公無赦皇心愛
不姑報讎論婉孌錫爵酹嗚呼相業今如在民生實少
痛誰能疵璧玉唯有泣瓊珠執簡書羣盜當關欠一夫
馳奔嗟薄日沐浴止中途決去思投闕違之或汎湖危
知無復死恨不奮前誅春雨煩冤滌朝陽癘思蘇謳吟
申感慨述作懼荒蕪芒忽思離散煮蒿起苑枯神還蒿
岳峻氣直斗杓孤陟降先皇側回翔造化徒英靈常會
合瞻想豈虛無

慶史顯甫治書父八十

治世尊三壽高年見八朝羽儀參漢皓神觀邁周喬柱
下聲名遠壺中日月饒微醺霞灼灼新沐雪蕭蕭地厚
原初峻天金玉不凋一經傳令子貳憲肅羣僚侃侃稱
時望英英樹國標繡衣兼綵服白日上青霄上壽歸榮
異推恩錫爵超紫深宗伯橐金重列侯腰珍膳應恒從
安車必見招乞言逾藥石報德稱瓊瑤千歲庭來鳳羣
工韻合韶陳詩方懿頌擊壤比康謠

送國王多爾濟之遼東

太祖收中夏元臣有武功建邦開土宇為位冠君公奕
世王章在諸孫相業隆春秋周正月禮樂魯新宮鹿幣
金遺耐熊侯筭失中河山仍鐵券寶玉右琯弓投筆鄒
枚秀揚旂芮綰雄塞雲依碣石凍雨洒遼東戎器橐藏
盡賢書奏納同大夫勞誓御惇史采民風

送陳碩

莆田陳氏慶厯名法從故家也自衆仲來京師集得

友焉凡問學脩己之事有並於愚陋多矣又從知其父兄之賢也問所自出則南塘趙氏信乎其學之有傳矣嘗以其從子碩來見予愛其端謹可望南歸省父衆仲送之以文予不能忘也乃賦詩曰

六歲過閩郡書聲憶滿城目盲今子夏心醉昔延平爾叔同遊息吾文愧老成每分重席暖相對一燈明遠海乘桴意高山伐木情願攜筇竹杖往看荔支生辟稼青衫舊趨庭綵服輕為言穿木榻亦未厭藜羹寶瑟留飛

鴈蘭舟及嘯鷺佩懷湘渚贈綬向會稽迎去去江雲濕
飄飄島霧清重來知有意時我已歸耕

奎章閣有靈壁石奇絕名世御書其上曰奎章玄
玉有勅命臣集賦詩臣再拜稽首而獻詩曰


禹貢收浮磬堯階望喬雲自天承雨露拔地起絪縕擊
拊磬音合衡從玉兆分巨鼇三島力威鳳九苞文辨位
資乾坎為山鎮幅員固知興寶藏不假運神斤書帙侵
春潤香爐借宿薰烟光晴冉冉波影晝泫泫融結繇元

化登崇荷聖君瑞於龜出洛重若鼎來汾柱立尊皇極
磐安廣帝勛詎云陳秘玩因願獻前聞

送南宮舍人趙子期宣詔交趾

三年頒正朔五月向南交將命方離闕陪臣已在郊衣
裳鴻羽漸干威虎皮包瘴霧衝風散瀧湍急雨捎朱鷺
窺土室白雉下櫓巢夜浦蛟停織陽岡荔圻苞初筵紛
氎罽後騎器茹饒諏日脩王貢兼時胝客庖方言書仄
理海錯藉菁茅漢柱苔侵篆秦林柱拂旃括囊無意苾

當戶有蠨蛸即見還英節毋煩筮繇爻



道園學古錄卷二

欽定四庫全書

集部
道園學古錄卷三

詳校官庶吉士_臣李如筠

侍讀_臣孫球覆勘

總校官進士_臣朱鈐

校對官中書_臣孫球

謄錄監生_臣項朝槐

欽定四庫全書

道園學古錄卷三

元 虞集 撰

芝亭永言

七言律詩

送袁伯長扈從上京

日色蒼涼映楮袍
時巡毋乃聖躬勞
天連閣道晨留輦
星散周廬夜屬櫓
白馬錦韉來窈窕
紫駝銀鬣出蒲萄

從官車騎多如雨祇有揚雄賦最高

代祀西嶽至成都作

我到成都纔十日駟馬橋下春水生
度江相送荷主意過家不留非我情
鷓鴣輕筏下溪足鸚鵡小窗知客名
賴得郾筵酒易醉夜深衝雨漢州城

贈星上人歸湘中

潭北湘南無影樹一花吹度海門潮
天香滿室定初起雲氣上衣身欲飄
寶月夜寒龍在鉢銀河秋近鵲成橋

豈無一箇邛州竹與爾松根共寂寥

子昂秋山圖

翁昔少年初畫山丹楓黃竹雜潺湲直疑積雨得深潤
不假浮雲相往還世外空青秋一色牕中遠黛曉千鬟
瀛洲雞犬同人境尚想翁歸向此間

題黃竹村所藏畫卷

雲覆城陰雪一坡寒梅疎竹共婆婆經行不覺籃輿遠
點染還疑綵筆多蜀棧煖雲生野樹匡廬晴照落江波

商公已老高公死惆悵誰人奈汝何

過池陽贈周南翁同知

使過池陽聞上日好懷浩蕩為君開江干維楫車馬集
亭上持盃風雨來通夜魚龍聽語竟明年鴛鴦憶朝回
九華秋色翠可食為問謫仙安在哉

安慶路雙蓮寺得上人超然亭

超然之亭何所超雙蓮孤塔共峩城頭疎雨散花至
江外斷雲將雨朝晨飲舊從香積化晚鐘仍送海門潮

尋原悵望空歸去此地安禪試往招

謝茅山主者贈白羅氅衣請為作大洞祖宗師四

十五贊

鶴氅裁成雪色新仙翁持寄感情真清高自此全拋俗
寬博由來穩稱身佩玉洞聞雲外響劍光飛射日中塵
畫圖寫向羣真裏便是揮毫贊詠人

送莫京甫廣憲經歷

延春閣下承恩日是我經帷侍講時方擁青編臨綺席

遙看朱紱拜丹墀風微細草鳴珂珮日暖飛花近鬢絲
上憶遠人常軫念莫言南海是天涯

集與諸公遊尚書何公山莊公孫斯明先為剪蘿
荆榛并致酒饌遂得瞻敬尚書墓道盡日乃還
偶成四詩酬斯明兄弟并簡同遊者

盛德高年陟泰階歸尋仙隱石樓開舊聞前引朱衣吏
每為行吟綠逕苔夜色園林瓊圃樹春寒亭館石湖梅
誰家今有賢孫子黃菊高秋與客來

先君夙有登臨志老去無能共往還
敢謂菊花憐寂寞
許教筇杖歷孱顏地高天近惟秋好
雲淡風輕盡日間
早晚涪翁酬素約更從几杖一躋攀

石梯一逕仙凡交過此先見蒼崖坳
幽穿斗角潛蛟窟
危出雲根棲鳳巢題字百神驚澗底
嘯歌衆籟越林梢
重吟仙伯石樓詠一解齊人山鬼嘲

黃姑仙崖置屋牢我躡飛磴如猿猱
環山翠黛是城郭
平地白雲皆海濤人頭關上走馬健
仙掌峰前飛隼高

願得金丹換毛骨三清八極共遊遨

黃氏妹之葬余以他故不及送之既葬之明日仲
常弟與譚元之表姪述事興懷形諸詠嘆後十
餘日始得併見諸公和章集憂患之餘觸事易
於傷感俯仰存歿不覺清涕之交頤也依舍弟
韻亦述二章一以示黃氏諸甥一以寄元之表姪
寒泉涓涓山木秋子弟行役荒原頭忍聽諸甥哭慈母
浩將孤淚灑新丘山川神氣蚤晚復珠璧輝光日夜浮

不惜衰年待爾輩受成積德過岑樓

憶別高堂十五秋不堪俯仰雪盈頭翁時贈玉歌清渭
子正將車從太丘久矣孤懷成寂寞勗哉古學矯虛浮
每看舍弟承咨辨如見從容月滿樓

題故太子少傳翰林承旨李野齋幽居圖

車蓋歸來托遠林魯山齒萃魯原深漁樵相識頻分席
賓客時過共賜金百歲儀刑猶近古五朝文物至于今
披圖想見登臨地松滿徂徠起夕陰

送江聲伯

家近茅峰無百里羨君來往及清秋每看丹井晨光起
幾見龍池雨氣浮白髮紅塵嗟我老素書玉訣使人愁
仙都羣老渾相識定著雲裘訪羽丘

歐陽元功待制入院後僕以兼領成均辰酉甚嚴
絕不得相見今夜當同宿齋宮賦此先寄并東
謝敬德脩撰

學省初兼禁直稀故人同署却相違食餘首肯承朝日

坐候棠梨過夕暉

成均堂東有棠梨樹日影至則師生始散二十餘年矣

預喜奉

祠秋寺燭定知催襍早朝衣
今晨瘦馬經門巷想擁青

綾尚掩扉

次韻張蔡國公淡菴青山寺詩

相國觀山負夙期聖恩祇許暫相違
身隨雲影留三宿心了泉聲絕百非
開士談空依寶樹野人耕雨薦山薇
雙龍深護安禪處繞坐諸天近紫微

次韻國子監同官

坐隱烏皮髀肉消諸生應笑懶邊韶階前老馬隨秋草
袖裏遺編俟早朝乞米西隣晨有粥留家南國暑無綃
經明亦是歸耕好清夢無時萬里橋

學宮南直禁垣陰假寓唯愁兩壁沈一曲鏡湖遺老事
三年經幄小臣心銀河回夜天逾近草逕迎秋露轉深
珍重鄉人居巷北時能來往和鳴琴

次韻馬伯庸寶鑑學士見貽詩并簡曹子貞學士

燕信臣待制彭允蹈待制

禁廬曉直夾城西經筵龍光映壁奎繞閣浮雲飛野馬
當階生草伏馴麋雷行已識天无妄風烈唯聞帝弗迷
徒積寸誠無補報每還冰暑欲雞栖

其二

奉節通宵虎帳西重光貫玉護文奎賜餘分食兼羔雉
侍側專茵雜豹麋樂事易成團月怨吟情深入五雲迷
上林更有高枝在彩鳳還來擇舊栖

鼇峰者國史院庭中石名也伯寧御史為僕言自

其先公時與諸老名勝賦詩者蓋數百篇今玉
堂無本而御史家具有之且曰峯所托差低盍
稍崇其址乃八月五日既克如命因賦此以報
且請錄示舊詩補故事以傳云

視草堂前石一拳何人移置自何年久憐翠色連重地
故拔孤根近九天俯仰百年承雨露等閒千尺接雲煙
故家御史遺書在為錄黿峰舊賦篇

進講後侍宴大明殿和伯庸贊善韻

丞相承恩自九天講臣春殿秩初筵養賢敢謂占頤象
陳戒猶思誦抑篇既奏文韶兼善美豈無后稷暨艱鮮
願推餘澤均黎庶樂只邦基億萬年

劍履歸來帶玉璫元臣促召不崇朝盍簪誠與朋求助
納約須從牖向招御柳新條臨畫殿仙桃曉色上春潮
校書寂寞揚雄老亦賦凌雲麗九霄

十一月二十夜思仲常弟

江梅應發去年叢叔也俄為畢竟空來後去先康節苦

離多會少子瞻窮近書時閱猶疑在舊學重思孰與同
萬里相從憐季子白頭清淚夜牕中

還京聞計在秋餘老淚無多眼易枯丹旄到無頻入夢
佳城得否未收書食貧未已憐孤幼述德無聞愧老夫
忍讀近緘成永訣為敦衰薄趣歸與

次韻道士竇神清賦蟬栗

帝德無為保太和歷山遺種有嘉禾想經稷教躬耕法
正及堯時擊壤歌旆旆九秋新雨露離離千古舊山河

曲肱飲水幾忘肉最憶宣尼感歎多

太一道士張彥輔族本國人從玄德真人學道妙
齡逸趣特精繪事為其友天台徐中孚用商集
賢家法作江南秋思圖東觀大隱蜀虞翁生為
賦此詩

三年別却釣魚磯
晝看新圖夜夢歸
石壁蒼松含爽氣
江沙翠竹弄晴暉
西瞻雪嶺家何在
東入天台路轉微
賀監若蒙湖曲賜
遍翔千仞振塵衣

贈寶神清歸隱茅山

翩翩歸鶴自遼東又向茅山擬住冬啄食定依何處竹
結巢應得古時松雪滿空山騎一虎月明秋水佩雙龍
別來彷彿三千歲亦欲還栖第一峰

題南野亭

門外煙塵接帝局坐中春色自幽亭雲橫北極知天近
日轉東華覺地靈前澗魚遊留客釣上林鶯囀把杯聽
莫嗟韋曲花無賴留擅終南雨後青

送貢仲章學士奉祠歡瀆

三十過從今六旬故人唯我兩吟身
空華作賦相為壽寧復升堂互拜親
送別轉令嗟影獨思歸從此上心頻
南湖春滿鷗波綠定艤乘槎往問津

次韻吳成季宗師赤城阻雨

人間伏日當蚤休道上馬車如水流
神仙不愁風雨夕父老已知禾黍秋
誰憐司馬久多病惟有杜康能解憂
北溟之鵬六月息載我八極歌遠遊

次韻伯庸尚書春暮遊七祖真人庵兼簡吳宗師
賞心不作三春過高興都為百事牽願解蘭舟溪水沉
思攜藜杖野雲穿真人館在無塵界太尉詩如絕行仙
花下共遊仍獨往不辭泥醉晚朝天

石渠承雨作流泉中有參差荇菜牽花近飛觴魚駭逝
柳低步障燕隨穿紅塵朝路常參吏清晝齋居幾劫仙
但乞會稽尋賀監酒船一棹水中天

花時宮館多賓客春酒盈缸餽在牽據石發歌風為起

臨流揮翰硯將穿紫髯一去惟憑夢白髮頻搔豈解仙
賴有看雲高閣在江東烟樹共晴天

一住京華三十年春花秋月謾相牽高情總付珠簾卷
危坐空餘木榻穿水曲停驂新襖事牆陰題字昔遊仙
動成陳迹多惆悵安得長生老後天

送宋誠甫太監祀天妃

使者受節大明殿候神海上非求仙廟前水生客戾止
帷中靈語風泠然麗牲有石載文字沈璧用纁求淵泉

賈生何可久不見海若率職君子還

觸石墜馬卧病蒙恩予告先至上京寄漑之學士

敬仲參書

翠幄臨都尚駐郊言瞻龍漢度前茅雨餘草氣千原合
日下雲章五色交給札脩辭持玉筆賜羹充腹出珍庖
白頭感遇知何補阿閣清嚴栖鳳巢

趨召顛隲歎日昏旋聞予告荷深恩樂頌西域千金劑
酒賜初筵九醞尊默憶舊書忘晝永行吟冷署覺春溫

摩挲素壁光於雪思得參書寫樹根

閒閒宗師和前韻期望過當復用韻以謝

草堂長憶蜀西郊屢卜歸休自折茅司馬檄傳驚父老
少陵詩苦入神交山多美竹深宜屋江有嘉魚遠致庖
乞得閒身當及早堯時元自有由巢

書卷連牀度曉昏懷歸猶復戀君恩養生賴得南華論
好客時傾北海尊山木向秋俱老大海霞迎日共清溫
蓬萊正與鼇峰接幾見浮雲起石根

雲州道中數聞異香

雲中樓閣翠峯堯載道飛香遠見招非有芝蘭從地出
略無烟霧只風飄玉皇案側當霄立王母池邊向日朝
却袖餘薰散人世九天清露海塵飄

次韻楊友直北行道中

蕭蕭戎馬昔升虛壯士吹笳慘不舒關外羽書三月急
道旁茅舍百年餘沙田雨足仍生黍河水冰消不禁漁
洛下賈生猶獻策平明立在玉階除

王儀伯參政見和郊字韻詩復用韻敘謝

龍遊宮沼鳳游郊通水明堂不剪茅
繇莖草儀三日具大烹饗帝五雲交
執輿已信神為馬和鼎寧容祝代庖
八月涼風張樂地頌聲洋溢播雲巢

聖遠言湮感墊昏河汾千載最知恩
垂紳論道稱前古束髮明經奉至尊
車騎身從游汗漫庭闈心在視寒溫
朝回未覺歸途晚斗柄西移揭角根

十月十六日奎章奏對回至李漑之學士宅宣旨

行香孔林案上得佳紙因賦此詩并得其鎮紙

玉蟾

聖恩深念魯東家林木蕭條散暮鴉
丹詔先令脩古廟彤庭即日遣皇華
閣中學士馳山驛天上文星絢海霞
偶為傳宣到書閣就牀奪得玉蝦蟇

次韻馬伯庸尚書

邃閣晨趨禁掖西暮街騎馬及鷄栖
退朝每想花邊散得句應從竹上題
賜被南宮無宿火齋居方丈有蒸藜

鳳池何似承明近久候文星共聚奎

送甘太史祀名山大川

太史名山閱秘經承恩衣繡許趨庭江頭飛蓋逢春雨
林下幽人識使星宣室夜深蓮燭絳石渠風煖竹書青
清朝盛典須成蹟最想遄歸駟馬駟

就甘太史并寄天台武夷太無三君

武夷山裏芝三秀華頂峰前黍一炊湖老每懷鴻去遠
山人毋謂鳳來遲浮關紫氣緣書住照夜青藜賴客知

賀監清狂天所放故令華髮侍安期

子昂墨竹

高崖數竹凌風雨老可當年每畫之脩影自憐流水遠
虛心如待出雲時縱橫鴻爪留沙磧宛轉鸞羣向墨池
百世湖州仍見此故知王子善參差

二十五日即事呈閣老諸學士

松陰鵠立候宮車風送飛花著白鬚水影漸移簾側畔
鷺聲祇在殿東隅近牀凝進名臣操載筆親題列女圖

太液雨餘波浪動龍舟初試散魚鳧

賦胡氏皆山

萬山起伏如波浪外固中寬故可居日出擁金千仞雪
雲生納翠八窗虛亭中留客多為酒客裏成樓更貯書
朝往莫歸勞杖屨醉翁應不憶環滁

賦礪山成簡卿心遠亭

作亭臨河河水渾草樹繞屋啼鳥聞夢回枕上彭城雨
目送簷間芒礪雲歸來黃菊有佳色坐老青山無垢氛

但願尊中常得酒曲阿莫問舊叅軍

送全州錄事

清湘郡城公事少錄事官曹盡日間且可隨雲度流水
更宜把酒看青山僧前虎跡石苔紫雨裏鳥聲江竹斑
應會吟詩一百首寄與明年春鴈還

與衆仲助教讀王臨川遺事慨然興懷良上人為
蔣山善公求送行因為賦此

霜筠雪竹鍾山寺最憶臨川舊所遊病骨荒陂秋澹澹

白頭遺恨思悠悠燕歸雲海迷華屋鷺起星河近綵舟
欲託善公重到日松間石上試相求

玉堂讀卷

玉堂策士詔儒臣御筆親題墨色新省樹坐移簾底日
宮壺馳賜殿頭春虞廷制作夔龍盛漢代文章董賈醇
書閣莫年偏感遇但歌天保答皇仁

謝吳宗師送牡丹并簡伯庸尚書

輕風紫陌少塵沙忽見金盤送好花雲氣自隨仙掌動

天香不許世人誇
青春有態當牕近
白髮多情插帽斜
最愛尚書才思別
解吟蝴蝶出東家

和范德機從楊撓進士見寄

清江先生最好奇
十年不出鬢如絲
田舍每詢歸後計
玉堂今見寄來詩
風前雨過林花動
日下雲行省樹移
還覓舊遊春欲暮
楊撓為我道深期

送進士劉聞文廷赴臨江錄事

清江百尺石為城
太華千峯積雨晴
官府幾時書帙靜

漁舟盡日釣絲輕故家好訪春秋學上國多傳月旦評
頗有老懷煩錄事到州為問范先生

大廷策士問經世之道僕忝在讀卷之列觀諸進
士所對有感賦此錄以贈別錙性粹中支渭興
文舉二賢良

昔人有欲問先天林下相期二十年已向塵埃成白髮
還從燈火事青編獲麟遂訖春秋後鳴鳥猶聞禮樂前
春雨未來農事晚獨懷歸計在山田

羅朋友道擢高科拜官還崇仁賦此為別

重溪疊嶂竹交加曾著芒屨踏白沙名勝多年嗟寂寞
文章此日羨才華青雲步武纔重見白屋詩書尚幾家

鄉邑相逢煩告語好敦忠信作生涯

白沙友道居近之昔崇仁有何同父

尚書李公父舍人墳墓故宅在焉國朝六科崇仁舉進士第者惟家弟與友道才二人故云重見所以深期望於來者云

贈趙生

天門一日觀黃榜茅屋三年掩素扉
綳帙蠹魚春雨潤

練囊螢火夜光微夢遊朔雪留鴻跡思入南雲望鶴飛
會倚宮牆看射策上林初日炫朝衣

贈昇龍觀主

榻前親製先生號賜與江南謝舜咨太華雲開天使下
少微星動史官知龍飛滄海留珠樹虎卧丹房守玉芝
聖主無為千萬壽更應築館候安期

訪李真人不遇

退朝花底佩珊珊去訪真人曉出關芳草欲迷行徑古

長松深護步廊間
蒼龍挾雨得瑤簡
白鹿穿雲致玉環
如到天壇看月影
定知清露滿人間

賦壺洲

傳聞海上有玄洲
曾是安期舊所遊
千頃白雲多種玉
一杯弱水不勝舟
魚龍夜護黃金鼎
鸞鵲晨朝紫綺裘
波浪不驚星斗近
步虛聲裏度清秋

旺扎勒圖下第歸蜀

西郊長憶草堂吟
塵外幽居更可尋
奏賦上林春事晚

攜書舊隱歲華深濯錦江波紅灩灩浣花潭水碧沈沈
白頭未覺歸歟暮待子重來報好音

吳宗師夢予得山居奇勝特甚夢覺厯厯分明忻
然相告賦此

夜來夢我山居好笑我平生豈有之野服許辭金殿直
俸錢足辦草堂資安知蓬島非兜率不是匡廬定武夷
還有勝緣同晚歲至人無睡已多時

答李簡伯司業分俎

憶昔同堂肄樂歌朝陽煦煦午風和炮羔升俎堆紅玉
醕酒盈尊汎綠波坐席已成三載別交情猶似嚮時多
尋常飽德寧私我願賦緇衣上禁坡

次韻朱本初訪李溉之學士不遇

城南城北煖塵飛伐木相求苦未歸吟到碧桃還細雨
行尋芳草又斜暉綺窻綠筆題詩徧斗帳沈香入袖微
共載小車勝上馬重遊莫待曉紅稀

寄趙子敬平章

聞道乘閒入翠微，猶愁嵐氣濕人衣。
道傍野樹飛花盡，溪上春雲作雨歸。
故舊釣絲輕在手，仙人棋局靜忘機。
赤松曾許同千載，擬向高秋傍鶴飛。

仁壽寺僧報更生佛祠前生瑞竹有懷故園

聞道故園生瑞竹，試從來使問何如。
蒼筤獨出千叢裏，翠節駢生數尺餘。
比管可吹丹穴鳳，長竿莫釣錦溪魚。
折筵已向靈氛卜，亦說能歸似兩疏。

聞道故園生瑞竹，令人歸興滿江干。
扁舟不畏瞿塘險，

匹馬誰云蜀道難杜甫溪頭花匝匝孔明廟裏柏闌珊
新堂題作歸歟字定得臨江把釣竿

聞道故園生瑞竹山僧為我重栽培百年雨露餘生息
一日風雲幾往迴壠上枯梅鴟萃止城東華表鶴歸來
聖恩若許歸田里千石清尊為爾開

聞道故園生瑞竹吾家孫子好歸看佛祠竟日春陰覆
先隴多年莫雨寒門戶淒涼嗟老病鄉關迢遞報平安
重來慎勿勞余夢駟馬橋邊據馬鞍

題張太玄為陳升海畫廬山圖

誰向匡廬成舊隱
畫中一似夢中看
千株松樹參天起
一箇茅亭傍水安
清風空谷傳吟嘯
白日高岑生羽翰
寄語山中陸脩靜
葛巾不畏過溪寒

別國史院鼇峰石

秋雨莓苔數尺身
文章曾見昔年人
吁嗟一代興王盛
付托諸公製作新
垌野有詩皆在魯
泰山無刻更先秦
鳳麟一去無消息
空使駑駘愧後塵

執戟楊郎久不遷頻年從幸到甘泉
賜歸特許先三日作賦時令奏一篇
翠勺娛人花帶露貂裘倚馬草橫烟
殷勤為謝堂前石何處來秋共月圓

神鳳琴

鳴鳥人間久不聞遺音欲託斷琴紋
曾看土鼓歌朝日亦共陶尊醉夜分
五色雲中迎太一九疑山下望湘君
采詩應被唐風譜早晚樓船或祀汾

繼陶居士傳

湘水滔滔蜀嶺高飛蓬千里棘心勞道間化虎作人語
城上慈烏向子嗥玉樹斷歌殘王氣朱門往事付鴻毛
將軍莫歎今為庶居士當年已繼陶

謝書巢送宣和瀘石硯

巢翁新得瀘州硯拂拭塵埃送老樵毀壁復完知故物
沈沙俄出認前朝豪翻夜雨天垂藻墨汎春冰地應潮
恐名相如今草檄為懷諸葛渡軍遙

送蘇伯脩御史

新除御史南臺去頓覺文星闕下稀病起可堪江霧濕
信還莫待苑花飛千年鳳鳥來阿閣萬里鱸魚出釣磯
總道揚雄文最古君知頭白久思歸

次韻柯玉文寄別

避弋驚鴻過遠汀啄苔病鶴想華亭臨邛枉騎情都盡
於越扁舟影更傳賓客莫詢溫室樹君王猶問楚江萍
重來賈傅非年少前席從容對夕廷

謝書巢惠梅花

巢翁遠送梅花樹正在東風四日前紅萼無言餘舊雪
白頭相見又新年喜從嘉樹來江雨憶共香秔上海船
春夜不眠賓客醉只留孤鶴伴清妍

再用韻簡巢翁

豈無尊酒梅花側聞道長齋繡佛前方閣護雲宜煖日
小車衝雪稱高年願辭閣下金蓮炬但乞湖中罨畫船
約取巢翁攜鶴去鬢毛同白不爭妍

送玉泉長老栗木果

非青非黃栗木果使者西川馬上來
楚國共疑金橘味
衛人祇道木瓜栽
頻婆妙色情懷別
橄欖餘甘齒頰迴
歸到玉泉應說法
試令關老聽轟雷

送王君實御史

頓覺文星闕下稀
旁人猶道此言非
東風十日京城雪
西道三春客子衣
鶯滿輞川君定到
鵲啼劍閣我思歸
千花並繞圖書府
相待承恩入紫微

寄句曲外史張伯雨

獨抱長鑱管白雲琴心誰錄內篇文清齋三日秋仍瘦
徧禮羣真夜每分石記恐妨塵外事仙經聊許世人聞
已從司馬求真錄更為通章九老君

寄答馬昂夫總管

白髮先朝舊從官幾年南郡尚盤桓九華山裏詩題徧
采石江頭酒量寬雁到京城還日暮馬懷餘棧又春殘
何時得共鳴臯鶴八月匡廬散羽翰

觀大洞經書與董道士

金史卷之三
江東昔有大茅君大藥親令二弟分紺綠俄消頭上雪
玄黃初合洞中雲雷鳴春谷龍三變月滿秋空鶴一羣
一落人間成老大何年名字刻瓊文

送劉宗師歸茅山

長松落落千峰雪碧漢寥寥一鶴風十月暫離句曲洞
早春還謁大明宮君王舊識蒼龍劍圖畫新傳白髮翁
欲把紫芝歌隱德三茅應聽月明中

與薩都拉進士

當年薦士多材俊忽見新詩實失驚今日玉堂須倚馬
幾時上苑共聽鶯賈生誰謂年猶少庾信空慚老更成
惟有臺中馬侍御金盤承露最多情

送歐陽元功謁告還瀏陽

憶昔先君早識賢手封製作動成編交游有道真三益
翰墨同朝又十年心似古人機獨敏用周當世德仍全
雍祠已有蒼崖石欲托高文與代傳

曉奉新書進御牀解纓隨見濯滄浪歸鴻不計江雲濶

倦驥空懷野水長竹簟暑風魂夢遠茶烟清晝鬢毛蒼
監輿千里宜春道投老相求訪石霜

送王師魯編脩祠南鎮

山陰巖壑多塵迹王事能來況暮春太史好探神禹穴
老夫先是會稽人海東日出雕闌近湖上風生白苧新
若得柂樓同晚飯便從賀監卜為隣

次韻楊友直

真館能容客避囂深簾飛絮畫寥寥數枝芍藥誰相贈

一束生芻故可招坐定驚雷經席上酒闌纖月在林標
何由長共陶弘景聽取松風作鳳韶

題東平王與盛熙明手卷

宋宣和手勅一通卷首題識四字我朝英宗皇帝御
書也帝嘗以至治三年正月十五日幸五華山臣有
以此書獻者丞相拜珠侍側就題以賜之既歸第
曲先盛熙明寫金字佛書一帙贊丞相丞相因以此
卷貶之且語以其故至順三年三月八日照明屬歐

陽玄記其事於左方

聖代御題前代勅小臣叨備史臣書事業久為人土直
文章猶作世璠璣海淪碣石圖空在墓築祁連計已疎
誰識全燕天所靳萬年形勝帝王居

和馬侍御西山口占

岧峣宮殿水西頭春日時聞翠輦遊霧引旌幢連閣道
風傳鐘鼓出城樓羣臣頌德金為刻萬歲稱觴玉作流
避暑醴泉涼氣早旋京應喜大田秋

到先隴為墓人書

未忍他鄉作故鄉
故因使騎入陵陽
鄉人共訝聲音似
客路宜將鬢髮蒼
親老常懷鄉里意
孫多宜置墓田旁
治生自可依諸葛
數頃膏腴八百桑

八月十五日傷感

宮車曉送出神州
點點霜華入敝裘
無復文章通紫禁
空餘涕淚洒清秋
苑中首箇烟光合
塞外蒲萄露氣浮
最憶御前催草詔
承恩回首幾星周

題煖翠亭

老去唯思卧白雲一亭萬竹喜初聞
波回曉日鴛鴦並沙散晴烟翡翠分
把釣左泉歸衛女乘舟北渚望湘君
誰能獨采薇盈袖却道高寒思不羣

送許有孚赴湖廣提舉

奉詔掄文秘殿西才華知合藉金閨
思親浩蕩江波遠戀闕遲回苑樹低
望鶴樓前移綵鷁吟詩花底聽黃鸝
歸來尚覺春風早鴈字充庭玉筍齊

賦石竹

積雪初消萼綠華東風吹動絳綃霞龍嘘石氣千年潤
鶴過林陰一逕斜刻字欲尋金錯落析旌如織翠交加
綺牕坐對吹笙暖未覺人間歲月賒

集為多爾濟慎齋平章題紫微亭用王右丞語也

并賦詩一首奉寄

右丞昔向終南住獨對南山賦紫微春雨乍收原上牧
晚晴仍見谷中歸好留杜牧為賓客更覓園公共薜薇

聞道新亭多雅興
想持尊酒看清暉

賦碧筠堂

藹藹江東雨後雲
碧筠堂上注芳樽
眉山老去無賓客
番水春生有子孫
團扇晚涼留翠黛
疎林纖月對黃昏
問誰吹得參差玉
為斲蒼苔向石根

奉同吳宗師賦蔡七祖新齋

城南烟樹聽鶯啼
石上莓苔覓舊題
自有琴心傳內景
更將書帙事幽棲
晚來相鶴風生竹
雨過籠鵝水滿溪

蜀客草玄成底事蕭條白髮愧青藜

次韻吳宗師

硯池滿貯薔薇水罌腹輕磨翡翠釵仙苑烟雲隨地煖
道山風日向春佳巢笙夜夜鳴金屋飛舄時時步玉階
祇恐江頭花事晚謾勞車馬賦茅齋

寄來鶴亭主人

德清舊館何時到雨後春泉定滿池綠字久無弘景信
紫苔應長少霞碑數峰烟樹天垂野千頃鷗波雨散絲

海內交遊多老去為誰溪上放船遲

送王中夫赴安慶教授

太行積雪都消盡船到舒州水正高
江樹連城分野色門生加豆薦溪毛
尋原自去書山石問字誰能載醴醪
為覓種椒張處士早收丹實待歸舸

予延祐己未秋南歸安慶城東有張教授與予同
舟從者得椒實數升至江右種皆成予復來京師
又十數年山中椒已無存者可為求種秋過江上

行取之爾

送張兵部巡視運河

畫橋冰泮動龍舟
鴨綠粼粼出御溝
使者旌旗穿柳過
人家鳬鴈傍溪浮
桃花吹雨春牽纜
江水平堤夜唱籌
應有餘波方浩蕩
不令歸楫恨淹留

謝吳宗師惠墨

念我衰年不廢書
錦囊古墨送幽居
明窗塵影丹同熟
玄圃雲英玉不如
敢謂文章勝虎豹
祇應箋註到蟲魚

研磨不盡人間老傳與兒孫尚有餘

再和

慣見天真按筆書七言婉麗出閒居誰云太璞無存者
藏丹在丹房已久如寫韻臺虛人跨虎換鷺池暖水生魚
玄霜比似金丹秘祇得刀圭便有餘

家傳戈法負遺書得墨深將藻繪居華采每慚誇既往
平安聊遣問何如畫殘翠黛愁蛾綠寫得黃庭辟蠹魚
鬚髮如霜還可染硯池不敢棄君餘

三用韻答巢翁就以奎章賜墨贈之

隣父長思長史書不辭頻謁惱巢居臨池三月玄霜盡
對月千篇白雪如賦敵洛波翔翠羽歌成湘浦媵文魚
故分瀘石松烟色猶是奎章舊賜餘

四用韻寄吳宗師奉祠城東岱祀其一謝夏真人
送海棠一枝

休奉東封遠獻書神宮咫尺九重居香飄秘殿人顯若
靈降方壇樂翕如水上袂除祠候燕雨中歸牧夢占魚

金定巳居金言
卷三
此時最憶風雲地濯濯清沂詠歎餘

定計歸來已束書高齋虛寂似禪居好花送與春風共
病目愁看宿霧如四月落林多野筍半陂流水足溪魚
今春又過今秋早一飯跣趺不願餘

謝吳宗師送牡丹

人人看盡洛陽花誰似堯夫小小車高閣每煩君寶望
西街還過伯淳家東風寒食炊烟散燕子空梁暮景斜
最憶青城坪上樹樵人祇向擔頭誇

題著色山圖

江樹重重江水深
楚王宮殿在山陰
白雲窈窕生春浦
翠黛嬋娟對晚岑
宋玉少時多諷詠
江淹老去倦登臨
扁舟却上巴陵去
閒聽孤猿月下吟

題熊太古畫

亭上長松三百丈
何人可以此經過
窮冬藜杖出同谷
清夏籃輿還曲阿
栖鵲每來從島嶼
老猿時復下藤蘿
王維韋偃久不見
病目摩挲愁奈何

送趙伯常自中臺出貳淮憲

淮南地沃偏宜麥况可扁舟弋鴈鳬此地正須能賦客
中臺新剖使君符山城過雨驚春盡野老扶藜到日晡
行部若臨江岸濶烟波冉冉有漁夫

送淨慈書記

寒梅的的西來意翠竹青青劫外春日出碧鷄山作霧
臺空彩鳳地無塵八年寫遍湖光好萬里歸來月色新
我在錦官城裏住白雲滿屋便為隣

送趙秉彝因王君實末章以起句

朝裏儒官盡白頭
斯言三復使人愁
芳叢獨見芝蘭樹
蚤歲不矜稊稗秋
藏書靈谷訪遺老
把釣清江懷故侯
大中梁棟小椽桷
匠氏尋引還相求

題畫

緝熙殿裏御屏風
零落誰收百歲中
錦樹總含春雨露
畫橋猶是舊青紅
花開陌上懷歸燕
潮落江頭送去鴻
何似綠波生太液
絳桃風急綵船東

城東觀杏花

明日城東看杏花
丁寧兒子蚤將車
路從丹鳳樓前過
酒向金魚館裏賒
綠水滿溝生杜若
暖雲將雨少塵沙
絕勝羊傳襄陽道
歸騎西風擁鼓笳

題張希孟中丞送畢提點申達卷後

十年七聘不還朝
起為飢民夜駕輶
嘉樹百年誰忍伐
生芻一束不能招
西州華屋交遊少
北海清尊意氣消
欲寫濟南名士傳
泉聲山影晚蕭蕭

寄海南故將軍

海上風來五月秋，晚涼應上木蘭舟。
金盤丹荔生南國，玉碗清冰出北州。
狂客醉時花作陣，美人歌罷月如鉤。
期門舊識將軍面，從獵還披翠羽裘。

次韻宋誠甫學士城南訪病莫歸

騎馬城南覓舊題，飄蕭席帽碧雲低。
東風花柳過韋曲，落日兒童唱大堤。
繡閣豈無和玉髓，錦囊還有鑄金蹄。
歸來吟轉樓頭月，池冷芙蓉翡翠栖。

寄泉南三老人

春城連海樹扶疎中有幽人八十餘
庾信流傳江左賦伏生零落濟南書
鄰翁社舞尊多酒弟子晨炊饌有魚
前代衣冠今絕少故懷三老載安車

次韻答衆仲助教相壽之句

老牛無力服柴車道遠鞭驅未到家
碩果當留霜後樹寒梅深辨雪中花
青城萬里懷空谷滄海千年望太霞
賴有良朋相慰藉釣竿隨分倚江沙

題喀喇子山尚書凝香小隱六韻

羣玉府中香滿袖凝春亭裏看花開綵雲近席微風動
紅日當牕好客來西海珊瑚階下長東家蝴蝶雪中回
竹深每聽尚書履池煖時分太液盃鳳味浮烟金錯落
鶯羣隨水白毳毼人間應得函封帖青李來禽繞舍栽
次韻杜德常博士萬歲山

祕閣沈沈便殿西頻年立此聽春鸝風搖翠岸新生柳
雨浥銅池舊產芝玉几由來常咫尺衡門此日遂栖遲

申生欲去柴車在杜甫長吟雪鬢垂墨沼遊魚翻宿藻
畫檐飛燕睨晴絲山中竹簟涼如水應夢釣天九奏時

次韻宋顯甫

御溝雪融三月初鳬鷺鴻雁總來居蒲萄水綠可為酒
楊柳條青堪貫魚逆邏天河起箕尾泥濘雲海浮青徐
舟前花落傍飛燕隄上風來濕舞裾翠輦時留金駸覆
錦波不著玉芙蓉臨流宋玉偏能賦莫待東都客問余

絕句五言

燕陳公子宅贈燕學士

落日照大隄花間聞馬嘶城頭鼓角起相送五門西

宣和墨竹寒雀

洒墨寫琅玕深宮春晝閒蕭條數枝雪不似紇干山

上馬

眼昏身手鈍上馬怕風沙祇好扶藜杖循籬看落花

題旦僉司所藏慧甄腐瓜行蟻圖

瓜腐來螻蟻梧生致鳳凰荒園空宿雨阿閣自春陽

雙鴛圖

戢翼石梁陰秋風日夜深使君莫行野江水蕩人心

畫扇雀竹

啄粟野田莫飛鳴亦求雌誰家江上雨發船歌竹枝

畫扇柳蟬

不食遂終日長吟如老翁金盤九秋露玉樹一絲風

畫雙蝶

舞罷庭花落池邊看睡鳬無端雙蛺蝶飛上繡羅襦

商德符畫松

松根生茯苓松葉纏兔絲服之可長生歸哉南山陞

河梁泣別圖

落葉滿長安秋風漢節還裁詩寄歸鴈三月到天山

題蒙古松壑畫

長風壑中來吹雨洒高竹憶昔曾見之終南跨黃犢

捕魚圖

網罟日相從天寒澤國空釣竿長倚樹老却渭川翁

子昂畫

拂石叢竹間
采蘭幽林下
遊子憺忘歸
何以遺遠者

又

松上一枝雪
竹間千本蘭
江濤嗟遠道
風雨憶春寒

雜寫

韓子登華封
縣令捐其階
囂呼始得下
亦不傷雅懷

又

粵人善操舟
先去令人愁
今年水未落
不見蓴鱸秋

又

狂罵人不怒徒然傷天和問君丹丘月當勝白蘋波

又

雲間陸士龍寧知千金貲文章倘有取論薦何愧辭

又

長鬚一握雪昏目九重雲不為成去計猿鶴皆怨紛

又

夕望姑蘇月晨瞻太湖波金章還闕下隨意覓漁蓑

又

貪祿戀君恩三年金馬門願於堯舜世頭白老人村

題柯敬仲雜畫

北苑今仍在南宮奈老何青山解浮動端為白雲多

又

雨過蒼苔石雲生野岸泉幽懷春冉冉稚子秀娟娟

又

鐵石餘生色冰霜作曉妍春雷明日起何處尚龍眠

又

雨過黃陵廟蒼梧雲正愁何時倚虛幌對此滿林秋

又

江上秋漠漠風雨晚蕭蕭千載誰相識惟應待老樵

又

昔過篋簾谷鈎衣石角斜僂尋龍作杖拾得上天槎

又

黃金千鎖甲琬玉六簾鈎雨送鴛鴦夢烟籠翡翠愁

又

娟娟生玉潤楚楚作金聲羽扇迎風定羊車過月明

又

峽口春雲重江南夜雨多水深桃李渡風急竹枝歌

又

蒼涼初出日黃落早知秋不遇采芝客寧知叢桂幽

又

明堂要梁棟大匠取修直鬱屈崖石間秋風動蕭瑟

又

平陸蒼龍起近山生遠烟前村三萬頃明日水平田

又

莓苔生石路翠竹自交加不惜青鞵濕臨流踏白沙

又

昨夜采樵去偶逢三尺枯山人不到海不識是珊瑚

又

瀟洒一枝新惟堪掃淨塵白雲在窗戶留作老僧鄰

題李溉之學士湖上諸亭

烟蘿境

玉女乘烟霧松間采薜蘿飛行了無跡明月送空歌

金潭雲日

金沙灘上日潭底見雲行祇有琴高鯉時時或作羣

漏舟

春水如天上秋潭見月中如何列禦寇猶欲待冷風

紫霞滄洲

洞裏琴鳴澗洲前棹入雲凝尋雲谷叟同訪武夷君

秋水觀

湖深山影碧天淨月光空幸自無波浪蘋花謾晚風

無倪舟

三周華不注水影浸青天不上銀河去空明擊棹還

紅雲島

日出湖邊曙雲生島上紅綵舟移曲岸白塵對微風

蕭閒堂

受業蕭閒老令人憶稼軒高堂何處是湖曲長蘭蓀

松關

黛色浮空表蒼髯積雪邊鷄鳴從此度驢背向秋天

大千豪髮

善聽返無聲善視入無覩還將一緒雲散作萬山雨

觀心

炯炯燈留室微微息若存仰探當月窟俯察識天根

題熊太古畫

路過秦時檜家留蜀道山長安都看遍回首入柴關

又

海內此亭古幽村春事多扁舟歸未得江水已生波

敬仲竹樹古石

雪樹寒逾勁霜筠晚更脩玄雲動蒼石令我憶湖州

絕句六言

題柯博士畫

登孤丘而遠望見江上之楓林放余舟兮澧浦何天高

而水深

長短句

題柯博士九疑秋色圖

余獨將兮洞庭野雲徘徊兮天將雨望九疑兮不可見
結幽篁兮聊延佇

道園學古錄卷三